

# Maskani



## SABATO MCHANA

**Somo la Juma Hili:** *Kut. 35:1–36:7; Mwa. 1:1; Kut. 36:8–39:31; Ebr. 7:25; Kut. 40:1–38; Yn. 1:14.*

**Fungu la Kukariri:** “Ndipo lile wingu likaifunikiza hema ya kukutania, na huo utukufu wa Bwana ukaijaza maskani. . . . Kwa maana lile wingu la Bwana lilikuwa juu ya maskani wakati wa mchana, na mlikuwa na moto ndani yake wakati wa usiku, mbele ya macho ya nyumba ya Israeli katika safari zao zote” (*Kutoka 40:34, 38*).

**K**azi kuu ya watu wa Mungu katika Agano la Kale (na vilevile kwa ajili yetu leo) ilikuwa ni kuishi katika uhusiano wa karibu na Bwana; kumwabudu na kumtumikia; na, pia, kuwasilisha taswira sahihi ya Mungu kwa wengine (*Kum. 4:5–8*).

Katika bustani ya Edeni, Adamu na Hawa walijificha kutoka kwa Mungu kwa sababu dhambi yao iliwafanya kumwogopa. Hali ya kuwa wenye dhambi inawafanya wanadamu kwa asili kumwogopa Mungu, na hofu hii inapotosha mtazamo wetu juu ya tabia Yake. Habari njema ni kwamba Mungu anachukua hatua ya kwanza kuziba ufa huu na, na Yeye Mwenyewe, anarekebisha ufa na uhusiano uliovinjika. Anamwita mwenye dhambi arudi Kwake: “Uko wapi?” (*Mwanzo 3:9*).

Hivyo, utume wetu wa kwanza ni kuiwasilisha kwa usahihi tabia ya Mungu na matendo Yake ya upendo na haki kwa wale wanaotuzunguka. Watu wanapovutiwa na Mungu na kusadikishwa kuhusu upendo Wake usio na ubinafsi kwao, watayatoa maisha yao Kwake na kutii kile anachowaambia wafanye, wakijua ni kwa manufaa yao wenyewe.

Patakatifu palidhihirisha ukaribu wa Mungu na wanadamu na kufunua ukweli mkubwa kwao, ambao ni jinsi anavyowaokoa wale wanaokuja Kwake kwa imani.

*\*Jifunze somo la juma hili kwa maandalizi ya Sabato ya Septemba 27.*

## Sabato ya Bwana

Haidhuru ni kwa kiasi gani wale wanaoipinga Sabato ya siku ya saba wanatoa hoja, kwa uongo, kwamba ilikuwa kwa ajili ya Wayahudi pekee (siku ya saba ilitengwa na kutakaswa katika Bustani ya Edeni *tazama Mwa. 2:1-3*); au wanatoa hoja, kwa uongo, kwamba Wayahudi walisikia habari za sabato kwa mara ya kwanza pale Sinai (Wayahudi walikuwa wakiitunza Sabato kabla ya Sinai *tazama Kut. 16:22-29*)—hakuna shaka kwamba Sabato ilikuwa sehemu muhimu sana ya maisha ya Waebrania tangu mwanzo.

**Soma** Kutoka 35:1-3. Ni ukweli gani ulirudiwa tena na tena kwa watu hapa katika muktadha wa ujenzi wa hema takatifu?

Sabato na ujumbe wake ilikuwa, ni, na daima itakuwa kuhusu Mungu—Yeye ni nani na matendo Yake makuu ni yapi. Sabato inatukumbusha juu ya matendo Yake ya uumbaji na ya wokovu na kuelekeza umakini wetu kwa Mungu, anayetaka kukaa na watu Wake. Kwa njia hii, Sabato na patakatifu vinaelekeza katika mwelekeo uleule: kuwepo kwa Mungu katika maisha yetu.

Sabato ya kanisa la Agano la Kale inatoa ujumbe wa namna mbalimbali. Mtu anaweza kutoa muhtasari wa kiini chake katika

1. *Mungu ndiye Muumbaji*, na Biblia inaanza kwa tangazo hili zuri mno na la msingi (*Mwa. 1:1*). Kumbukumbu dhahiri ya uumbaji wa Mungu ni Sabato (*Mwa. 2:2, 3; Kut. 20:8-11*). Kutokana na ukweli huu—Mungu kama Muumbaji wetu—kweli zingine zote za Biblia zinachimbuka.

2. *Masihi atakuja*, na tumaini hili limejengwa juu ya ahadi ya Mungu ya Uzao, ambao ungemshinda nyoka (Shetani) na kuleta ushindi dhidi ya uovu.

3. *Mungu atausimamisha ufalme Wake*, na Sabato ndiyo mwonjo Wake wa kabla.

4. *Wokovu unatoka kwa Bwana*, na watu wa Mungu wanashuhudia kwamba Mungu ni Mwokozi na Mkombozi wao na kwamba wokovu unakuja kama matokeo ya neema Yake na neema Yake pekee.

5. *Mungu ndiye Mwamuzi wa mwisho wa watu wote*. Wale wanaodumu kumkataa (dharau) na kumkana hawatafanikiwa, lakini anawapa uzima wa milele bure wale wanaomfuata.

Wayahudi wana msembo: Zaidi ya Israeli ilivyoitunza Sabato, Sabato iliitunza Israeli. Ingawa sisi kama Waadventista wa Sabato pengine tusingeueleza hivyo, Sabato ina wajibu gani muhimu katika maisha ya familia yetu ya kanisa?



## Sadaka na Roho

**Soma** Kutoka 35:4–36:7. Tunapata masomo gani muhimu hapa leo?

Vifaa vingi vya thamani na vya aina mbalimbali vilihitajika ili kujenga hema takatifu, na ilikamilishwa kwa michango ya ukarimu kutoka kwa watu wa Mungu, waliotoa kutoka ndani kabisa ya mioyo yao, kwa hiari na kwa furaha. Walitoa dhahabu, fedha, shaba, kitani safi, vito vya thamani, vitambaa vya pekee, miti ya mshita, mafuta ya zeituni, manukato na vitu vingine vingi vilivyohitajika. Watu pia walichangia nguvu kazi zao, kwa sababu vitu vingi mahususi vilihitaji kutengenezwa kupitia kazi yao ya ustadi na ya bidii katika hema takatifu au samani zake. Pia, mafundi cherehani walipaswa kufuma mavazi kwa ajili ya makuhani, ambao wangukuwa wakihudumu katika hema takatifu, na kwa ajili ya kuhani mkuu, ambaye mavazi yake yaliyonakishiwa sana yakijumuisha kifuko cha kifuni na kilemba.

Mungu alikuwa amewabariki sana Waisraeli kupitia zawadi ambazo Wamisri walikuwa wamewapatia wakati wa kutoka kwao Misri. Sasa ilikuwa ni fursa yao ya kutoa sadaka za shukrani kwa ajili ya uongozi wa Mungu wenye rehema na nguvu, na mioyo yao iliguswa kukamilisha kazi hii kwa utukufu Wake.

Watu walikuwa wanatoa kwa furaha na kwa wingi kiasi kwamba Musa aliambiwa: “Watu waleta vitu vingi sana zaidi ya hivyo vitoshavyo” (*Kut. 36:5*). Kwa hiyo, ilibidi Musa asimamishe michango yao, “kwani vile vitu walivyokuwa navyo vilikuwa vinaatosha kwa kuifanya kazi hiyo yote, kisha vilizidi” kwenye hema la kukutania (*Kut. 36:7*).

Kupitia uongozi wa Roho Mtakatifu, Mungu aliwaandaa na kuwawezesha watu kujenga hema takatifu kwa usahihi. Bezaleli, Oholiabu, na wengine walijaa . . . Roho ya Mungu” (*Kut. 35:31*), inayomaanisha kwamba walijaliwa ujuzi, hekima, na maarifa stadi ili kufanya kazi yote kikamilifu. Ulikuwa mradi mkubwa sana na ulipaswa kufanywa kulingana na mfano ambao Mungu alimwonesha Musa.

Ni muhimu kwamba kipawa cha Roho Mtakatifu kilihusiana na uwezo na ujuzi wa aina mbalimbali za watu, uliipaswa kutumiwa katika kujenga hema takatifu. Kujazwa na Roho sio mchakato wa kichawi na hakumaanishi kwamba nguvu maalum za kiroho ziko ndani ya wanadamu. Ili kuendeleza kazi ya Mungu na kutimiza utume Wake, Mungu anawawezesha wafuasi Wake kutimiza malengo Yake na kuyafanya vyema.

Ni karama zipi za kiroho umepokea ulipojazwa na Roho Mtakatifu? Kumbuka kwamba karama za Roho zinaweza kustawi pale tu unapokuza matunda ya Roho katika maisha yako (*Gal. 5:22, 23*).

## Hema Takatifu Yajengwa

**Pitia** Kutoka 36:8–39:31. Unafikiri ni kwa nini maelekezo ya wazi kama haya yalitolewa? Hili linatufundisha nini kuhusu jinsi Mungu anavyojali kila jambo?

Musa alijenga hema takatifu kwa uangalifu, na maelekezo aliyokuwa amepokea juu ya Mlima Sinai yalitekelezwa kwa bidii. Andiko la Biblia linataja moja kawa moja yafuatayo: (1) maskani yenye vitambaa mbalimbali, mapazia, na sehemu zake (*Kut. 36:8–38*); (2) sanduku (*Kut. 37:1–9*); (3) meza ya mikate ya wonyesho (*Kut. 37:10–16*); (4) kinara cha taa (*Kut. 37:17–24*); (5) madhabahu ya kufukizia uvumba (*Kut. 37:25–29*); (6) madhabahu ya sadaka ya kutekelezwa (*Kut. 38:1–7*); (7) birika la kunawia (*Kut. 38:8*); (8) ua (*Kut. 38:9–20*); na (9) vifaa vilivyotumika kwa ajili ya maskani (*Kut. 38:21–31*). Kutoka 39 inaendelea na maelezo ya navera, kifuko cha kifuni, na vipande vingine vya vazi la kikuhani.

Huduma za hema takatifu zilikuwa masomo ya injili yanayoonekana yanayofundishwa kwa vielelezo, yakidhihirisha mpango mzima wa Mungu wa ukombozi. Taratibu mbalimbali za kidini zilielezea (1) jinsi Mungu anavyochukizwa sana na anavyoshughulika na dhambi, (2) jinsi anavyowaokoa watu wanaotubu, (3) ni nini hatima ya waovu, na (4) jinsi atakavyohakikisha wakati ujao wenye utukufu ambao hautakuwa na uovu.

Huduma za aina mbili tofauti lakini zenye uhusiano wa karibu zilifanywa katika patakatifu kwa mwaka mzima: za kila siku na za kila mwaka. Huduma hii ya awamu mbili ilielezea jinsi Mungu anavyoshughulika na dhambi na kuwaokoa wenye dhambi. Kupitia huduma za kila siku za patakatifu, Mungu aliwahakikishia wale waliotubu kwamba aliwasamehe dhambi zao na kuwapa wokovu kwa neema. Ili kupokea kipawa hiki cha wokovu, kafara ilipaswa kutolewa, na kafara hizi zilielekeza katika kifo cha Masihi, ambaye damu yake “yatusafisha dhambi yote” (*1 Yn. 1:7*). Ungamo la dhambi na kukubali vazi la haki ya Kristo ulikuwa katika kiini cha kipawa hiki (*Zab. 32:1, 2*). Kwa njia hii, mwenye dhambi aliyetubu alihakikishiwa msamaha na angeweza kufurahia wokovu.

Huduma ya kila mwaka, iliyofanywa katika Siku ya Upatanisho, ilielezea jinsi Mungu anavyoiondoa dhambi, kutatua tatizo la dhambi, na kuleta maisha ya wakati ujao usio na dhambi (*Lau. 16, Yn. 1:29*). Kwa sasa, huduma ya Kristo yenye sehemu mbili katika patakatifu pa mbinguni ni udhihirisho mwingine wa kazi ya Mungu kwa ajili yetu (*Ebr. 7:25*) na italeta suluhisho la mwisho kwa tatizo la uovu (*Dan. 7:13, 14, 22, 27; Dan. 8:14; Ufu. 21:4*).

Patakatifu palikuwa mahali pa kumwabudu Mungu, kumsifu na kumshukuru. Ibada inahusu kudumisha uhusiano wa mtu na Mungu, ambaye huwaalika waumini katika ushirika huo.



## Kuwepo kwa Mungu katika Hema Takatifu

**Soma** Kutoka 40:1–38. Waisraeli walitambua je kuwepo kwa Mungu?

Sura ya mwisho ya Kutoka (*Kutoka 40*) inaeleza kuwekwa wakfu kwa maskani na zawadi ya Amri Kumi. Kuwekwa wakfu kwa hema lilikuwa tukio la mwisho la Israeli pale Sinai.

Utukufu wa Mungu ni utakatifu Wake, tabia Yake, na uwepo Wake wenye upendo, ambao ni wema wenyewe (*Kut. 3:5; Kut. 33:18, 19*). Kuwepo Kwake kulijaza hema ya maskani na kulionekana kama wingu, Udhahirisho wa utukufu wa Mungu. Kitabu cha Kutoka kinamalizia kwa msisitizo juu ya kuwepo kwa Mungu kunakoongoza, katika wingu la Bwana wakati wa mchana, na katika wingu la moto wakati wa usiku. Kwa namna halisi na yenye nguvu sana, Waebrania walipaswa kupata uzoefu si tu wa uhalisi wa Mungu bali pia wa uwepo Wake wa karibu na wa kudumu alipokuwa anawaongoza.

Musa alisimamisha maskani siku ya kwanza ya mwezi wa kwanza katika mwaka wa pili (*Kut. 40:2, 17*). Pia aliweka wakfu kila kitu—pamoja na Haruni na wanawe kwa ajili ya ukuhani (*Kut. 40:9, 13–15*)—kwa kutiwa mafuta. Alipita katika Patakatifu pa Patakatifu, Patakatifu na ua, akiweka wakfu kwa Bwana. Kupitia mchakato huu, alizindua huduma za hema takatifu yote (*tazama pia Hes. 7:1*). Ni wakati wa kuzinduliwa kwa maskani pekee ndipo Musa aliweza kuingia Patakatifu pa Patakatifu; baada ya hapo, kuhani mkuu pekee yake ndiye angeweza kuhudumu huko kila mwaka katika Siku ya Upatanisho (*Law. 16:2, 17*).

Katika matukio matatu, andiko la Biblia linasema kwamba kazi ilimalizika: (1) mwishoni mwa juma la Uumbaji, Mungu anasisitiza kukamilika kwa kazi Zake za uumbaji (*Mwa. 2:1–3*); (2) baada ya kukamilika kwa maskani, andiko la Biblia linasema: “Basi Musa akaimaliza hiyo kazi” (*Kut. 40:33*); na (3) inaelezewa pia wakati Sulemani alipomaliza kazi ya kujenga hekalu (*1 Fal. 7:51*).

Uhusiano huu kati ya Uumbaji na patakatifu pa Israeli unaelekeza kwenye mawanda ya ulimwengu mzima, wakati Bwana atakapokaa pamoja na waliokombolewa katika nchi mpya katika Yerusalemu Mpya, ambayo ni “Maskani ya Mungu” (*Ufu. 21:2, 3*; linganisha na *Ufu. 22:1–4*).

Mungu kujaza maskani kwa utukufu Wake (*Kut. 40:34*) ulikuwa ni kilele chenye utukufu wa matukio yaliyoanza kwa kuzaliwa kwa Musa na kuendelea na kushindwa kwa miungu ya Wamisri wakati wa mapigo 10, na kuondoka Misri, na kushindwa kwa jeshi la Misri, na, hatimaye, kwa ufunuo wa Mungu juu ya Mlima Sinai.

Ni njia zipi ambazo, hata sasa, unaweza kupata uzoefu wa kuwepo kwa Mungu? Kwa nini ni muhimu kwamba ufanye hivyo?

## Yesu Alifanya Maskani Pamoja na Wanadamu

**Soma** Yohana 1:14. Kwa namna gani kufanyika mwili kwa Kristo kunalinganishwa na maskani?

Kutwaa ubinadamu kwa Yesu ni fumbo na pia sayansi ya pekee ambayo waliokombolewa watajifunza kwa umilele wote. Mtume Yohana anasema kwamba Kristo, kwa kujivika mwili wetu, alifunua kwamba anakaa nasi kwa namna iliyo dhahiri. Yesu hapa katika mwili anafanana na Mungu wa Agano la Kale, aliyekaa pamoja na Waisraeli katika hema takatifu huko Sinai na jangwani walipokuwa wakisafiri kwenda katika Nchi ya Ahadi.

Wakati wa kutwaa Kwake ubinadamu, Yesu alikaa pamoja na wanadamu. Ni ridhaa isiyoweza kueleweka kiasi gani! Mungu wa milele anashuka kwetu, ama nani wa wetu, ili kutuhakikishia kwamba Yeye kwa kweli ni Yemanueli, Mungu pamoja nasi."

Katika Mathayo 18:20, Yesu alisema kwamba ikiwa wawili au watatu wamekusanyika kwa jina Lake, atakuwa papo hapo katikati yao. Kristo yu pamoja na watu Wake kwa njia ya kuwepo kwa Roho Mtakatifu. Kristo anawaalika wafuasi Wake kuwa katika uhusiano wa karibu Naye: "Tazama, nasimama mlangoni, nabisha; mtu akiisikia sauti yangu, na kuufungua mlango, nitaingia kwake, nami nitakula pamoja naye, na yeye pamoja nami" (*Ufu. 3:20*).

**Soma** Ufunuo 21:1–3. Nini kinawasilishwa kwetu hapa?

Yerusalemu Mpya itashuka kutoka mbinguni hadi duniani, na Yohana anasema: "Tazama, maskani ya Mungu ni pamoja na wanadamu, naye atafanya maskani yake pamoja nao, nao watakuwa watu wake. Naye Mungu mwenyewe atakuwa pamoja nao" (*Ufu. 21:3*). Hakuna hekalu katika Yerusalemu Mpya (*Ufu. 21:22*) kwa sababu mji wote ni hekalu, maskani ya Mungu. Marefu, mapana, na kimo cha mji ni sawa (*Ufu. 21:16*) kama ilivyokuwa kwa Patakatifu pa Patakatifu katika maskani, palikuwa na umbo la mchemraba, na pande zote sawa. Kwa umilele, katika ulimwengu usio na dhambi, kifo, au mateso, tutakaa katika kuwepo kwa karibu sana kwa Mungu wetu.

**Tukitazama kile tulichoahidiwa katika Yesu, tunawezaje kujifunza kuvumilia hadi mwisho?**



**Jifunze Zaidi:** Soma Ellen G. White, “Hema ya Kukutania na Huduma Zake,” uk. 357–373, katika *Wazee na Manabii, Sehemu ya Kwaanza*.

Kujengwa kwa patakatifu kulitanguliwa na tendo la kiungu la ukombozi, yaani, kukombolewa kwa Israeli kutoka kwa mamlaka ya Misri iliyowatia utumwani. Hili, nalo, lilifuatwa na utayari wa Mungu kuingia katika uhusiano wa kudumu wa agano pamoja na watu Wake. Angekuwa Mungu wao, nao wangekuwa watu Wake (Kut. 6:7). Njia ambayo wangehusiana Naye na wao kwa wao ilifasiliwa na sheria ya agano. Maskani ilikuwa mahali pa kukutania, mahali ambapo Mungu na wanadamu walikutana. Ilikuwa tu baada ya ukombozi na kuanzishwa kwa mapatano ya kudumu pamoja na Mungu kupitia agano ndipo watu walipata njia ya kumfikia Mungu katika maskani Yake.”—Andrews Bible Commentary: Old Testament, “Exodus” (Berrien Springs, MI: Andrews University Press, 2020), uk. 226.

Wakati huohuo, Ellen G. White anaeleza kusudi la ibada za patakatifu: “Hivyo katika huduma ya hema ya kukutania, na ya hekalu ambalo baadaye lilichukua nafasi yake, watu walifundishwa kila siku kweli kuu zinazohusiana na kifo cha Kristo na huduma Yake, na mara moja kila mwaka akili zao zilielekezwa katika wakati ujao kwenye matukio ya kufungia pambano kuu baina ya Kristo na Shetani, yaani utakasaji wa mwisho wa ulimwengu kutokana na dhambi pamoja na wadhambi.”—Wazee na Manabii, uk. 373.

## Maswali ya Kujadili:

- ① Kiini cha ibada katika patakatifu kilikuwa ni kumwaga damu. Wanyama wa kila namna walitolewa kafara, na damu yao ilitumiwa karibu katika kaida zote za hekalu. Damu iliashiria nini, na kafara zote hizi zilielekeza katika nini hatimaye?
- ② Haidhuru inashangaza kiasi gani kwamba Mungu, Muumbaji wa ulimwengu, alikaa kati ya watu Wake katika patakatifu, inashangaza zaidi kiasi gani kwamba alikuja kukaa kati yetu kama mmoja wetu, mwanadamu? Hilo lenyewe linakuwa udhihirisho wa kushangaza wa upendo. Kisha tena kujitoa Nafsi kuwa dhabihu kwa ajili ya dhambi—yaani, kufa kwa ajili yetu? Hili linatufundisha nini kuhusu tabia ya Mungu? Pia, hili linatufundisha nini kuhusu jinsi Mungu anavyotaka kutuona tukiokolewa na kuingia katika ufalme Wake wa milele?
- ③ Soma Waebrania 8:1–6. Inatuambia nini kuhusu jinsi patakatifu pa duniani palivyoakisi kile Yesu anachotufanyia sasa katika patakatifu pa mbinguni?